

四庫全書

集部

# 欽定四庫全書

集部

瑤石山人稿卷八

詳校官監察御史<sub>臣</sub>曹坦

中書<sub>臣</sub>劉源溥覆勘

總校官編修<sub>臣</sub>王燕緒

校對官中書<sub>臣</sub>吳甸華

謄錄監生<sub>臣</sub>梁鳴岐

欽定四庫全書

瑤石山人稿卷七

明 黎民表 撰

五言律詩

元美改席于浮玉山同作

青山行不盡轉入道場幽孤塔雲相拄雙溪水合流  
舟移石不礙星落影還浮俯仰看今古能無憶醉遊

雨中留宿張幼千家

秉燭坐清夜攤書共草堂疎砧秋思早微雨客衾涼雞  
黍成良晤風波忽異鄉羈愁稍披露觸目見琳琅  
不為愁風雨還因戀解携途長思老馬夢短怯晨雞離  
思中年惡音書後夜題片帆何處落邗水易東西

廣陵旅舍歐楨伯陸華甫黃定甫過訪

草草簇蔬盤還追燕市歡雲停高閣暮雨過大江寒貧  
賤交情在風塵晤語難行裝戒前路誰問客衣單

同定甫遊李鳴卿園亭

世事足悠悠因君復漫遊行隨脩徑轉坐占小亭幽艷  
蒞晴堪摘清池夏不流詩情餘白首雲卧恣丹丘

謁董子祠

英風憐馬上間世覩人文玄冕加繁露青衿仰慶雲詩  
書維漢鼎柱石奠淮瀆東閣多奇士寥寥竟不聞

銅瓦廂謁大禹廟

德水千年在誰能忘禹功金隄非舊迹銅瓦見新宮野  
著滄涼日林交慘淡風路歧何用感王氣滿關東

冬夜過許計部官舍

壯心憐歲月濁酒話平生  
古院疎槐影高樓畫角聲  
孤蹤懸北闕倦翮思南征  
惟有無衣客同君獨夜情

趨順義縣

使者正乘輅東行上郡遙  
闕門臨井口城堡落山腰  
岸遠沙如雪風悲水似潮  
客愁何處著寒月助蕭蕭  
內園停使節地主啟華筵  
醺酒黃梁薄登盤紫茱圓  
軍聲飛鳥外鄉思捲蘆邊  
向夕無探騎平沙直際天

洪勝寺

野寺逢人少殘僧乞食遲  
古墻花不發叢薄鳥兼悲  
沙聚看塵劫天長立暝時  
伊吾慚撫劍剗草讀唐碑

峪口

翠削龐峰峻高蟠鳥道孤  
東西分幕府沙草滿平蕪  
牧馬閑千匹當關用一夫  
傳聞漢諸將猶議塞飛狐

過真如寺乾上人訪蔡文學子畊

霞蹤成海客休暇相尋累  
劫空彈指千言是說心  
當

門官樹直隱座佛燈深階雪方盈尺何人候少林

杜比部遣惠瓶酒白魚

碧酒雙絲絡銀盤小白魚味全勝冷炙情獨重春蔬凍  
瓦封霜後晴簷曝日餘賴君能好事難並太玄書

答陸山人本仁

三年無一字夢想落滄洲不遂金門謁還從廡下遊春  
生瓊樹館天遠洞庭舟薄劣風塵裏空慙駿馬求

紫荊關



徑轉蛇盤險雲連鳥去長山桃微著紫沙柳不成黃重  
鎮臨天府神功劃大荒金城誰獻議老作尚書郎

宿關城公署

深院靜松筠喧喧鳥雀羣窻明猶瞰雪榻冷半侵雲入  
夜風聲異邊關氣色分更長夢猿鶴不解賦從軍

飯銀釵嶺館舍

雲藏千仞壁日落數家村節冷無煙火沙乾乏水源山  
家供麥飯野邏具醪尊稍喜臨邊靜垂鞭出此門

戲風嶺

沙泥拆雨岸細路轉堪憎去馬衝風色征衣掛石稜疲  
兵時偃卧古堞更陵乘賴有銷愁地雲中岳色層

至王家莊風沙驟作

知是山陰近風威特地寒驚沙鳴索索落葉聚團團鐵  
筍腰間重戎衣馬上難章臺冶遊子不向塞垣看

渡桑乾河

古渡是桑乾征人曉涉寒鳴笳喧聚落帶劍擁材官霜

雪經行盡煙花出塞殘春衣猶未寄空倚月輪看

西行詠懷古跡

神龍困泥淖燕雀反見咤如何赤帝子遇窘白登臺謀  
臣雖幸中魚服幾殆哉不見芒碭氣陰風千里來

右平城

佳兵古所忌奇智人不親武靈何倜儻變服詫強秦禍  
機起牀第興亡由一身惟有邯鄲道千秋狐兔塵

右靈丘

傳道荆軻里町疃皆故丘隴樹無西指易水猶東流賢  
愚等共盡爾獨報君讐叔孫何首鼠詭對乃封侯

右荆軻宅

懸空寺與北岳相接

隱壁金繩起依山翠殿安兩崖分岳色百丈下風湍雲  
狹牽衣過天長仰面看石樓遙似畫歸去濯金盤

大雲寺在靈丘縣門對太白峰

誰知沙塞裏亦自稱禪棲雪漲晴沙合山歌晚堞低多

歧分客路一宿憩招提纔有安心處關門又聽雞

同翟孝廉廷楠宿北岳頂

貧竒猶未已襟被宿諸峰入夜驚栖鶴知君是卧龍投  
杯臨瀑水卧簟展青松自覺非人世煙霞衣袖重

橫翠樓元將張柔所建

高樓當絕塞春望轉氤氲百戰全燕地千重大漠雲控  
弦無敵騎飲羽憶將軍老去親戎馬悲笳向夕聞

答栢山人

邂逅夷門客懸燈共和詩竹齋鳴雨歇卧簾曉涼披肝  
膽平生是風塵此晤宜夜闌渾不寐五岳起予思

秋夜楊懋功宅同王敬美諸子集得春字

白露沾衣重涼風送酒頻二京多賦客

王楊二君與予俱曾官南省

七夕會佳人月隱長河色花餘小苑春合併良不易留  
滯任緇塵

七夕別張羽王得平字

隱樹風初起臨堦月乍明故人千里別仙媛隔年情爽

氣侵鸞扇輕陰下鳳城惜無雙寶劍濁酒見生平

祝樓張封君挽詩

老萊堅隱操襄漢接衡門徑竹餘千畝籬花具一尊  
氣俄金馬淡星竟少微昏萬里生芻淚遙遙寄楚猿

遂初堂為尤茂先作

何年遺邸第軒豁水雲鄉玉乳斜分溜青谿曲抱堂  
虹流奎畫在日曬竹書光欲榜遊吳楫名園偶辟疆

別舍弟惟仁南歸

聯牀初引興，輦鼓忽驚心。  
售玉空燕市，思家祇越吟。  
微名人競老，古調獨何深。  
失路唯堪念，先予到故林。

送王百穀還吳

才名天亦妬，連蹇似君稀。  
得病因成賦，還家憶授衣。  
秋蛩吟共苦，霜月影同依。  
舊識平津邸，無嗟此道非。

送管建初

十上貂裘敝，誰能老漢關。  
祇應巖下客，長望日邊還。  
獵火明秋塞，河流直故山。  
身閑且歸去，名姓在人間。



寄吳惟善陸本仁二君

五湖秋望遠懷古意徒深爾逐闕門吏猶懸魏闕心相  
思如夢寐得句動沉吟愁絕荆溪上菱歌不易尋

黃定父自維揚至過訪旅寓

古誼惟君獨征途訪我遙夢來淮水月棹發廣陵潮脫  
粟期同飯村醪為解貂羈心正愁絕賴有桂叢招

送華文學之留都

載書初詣闕沿牒復歸吳經筭諸生學章縫魯國儒軒

車榮故里雨雪戒長途白虎羣賢在還來賦論都

何山人以詩過謁答之

同旅誰相問新詩獨見投校書非馬廐為客任貂裘世  
事憑雙壁君才老一丘陸雲書儘好須作鄮中遊

送陳垣卿之臨川文學

遠宦憐鄉土名山稱賞心松蘿勝絳帳乳洞洽青襟兵  
已銷篁竹書堪奏上林逍遙樓名還引望雲氣五陵深

送大庾僧遊五臺山

離却梅花國西遊復渡河風沙僧律苦湖海梵緣多遠  
聚投人住殘年避雪過媿予塵想在頻夜夢煙蘿

送梁持伯奉使南還

房杜千秋後諸昆復象賢侍晨辭魏闕把詔下江天細  
草縈花綬輕雲翼錦韉高堂稱慶畢相待日華邊

送何介卿明府之任融邑

北關方沿牒西遊復過家非緣尋碧柳應喜得丹砂暑  
月纔衣葛王程正及瓜遠方知納款一為報京華

端午賜扇綵樓

分直從芸省霑恩自鳳闈織成千縷細裁就一輪輝爽  
氣微生握霞紋半入衣山龍無寸補徒自濫雲飛

獻俘禮成頒賜金幣

玉闕初送款漢殿正垂裳恩出兼金重功微尺組長禮  
成霑綺饌喜極舉瑤觴王會千秋盛無勞事朔方

白雪山房為李惟寅典禁賦

郢曲無人和南音每自操青雲今少達玉樹轉孤高兵

偃閑金甲林棲接緼袍雖懸雙鵲印未敵飲春醪

送梁幼希之興國文學

抱玉無嗟屈談經自感恩相門韋氏在儒行魯人尊暮  
雨過章水停雲近故園賢良紛論難遲爾侍金門

送李少芬之新城文學

此去蘓湖近千秋見典刑風流看帶印青紫起談經漁  
浦開官閣嚴灘問草亭壯遊應不負鰲釣掣滄溟

送方進士季隣之烏程

新恩多出宰，美爾獨遊吳。官閣傍連寺，春城半入湖。  
山川良具美，井邑未全蘇。誰解陳封事，翩翩待玉鳬。

送蔣氏兄弟還南中

北地霜風勁，南中二妙歸。雲間連彩翮，堂上待斑衣。  
三徑蓬蒿在，千山道路微。睠然臺省客，玉樹夢音徽。

送何子還嶺南

一雨驅殘暑，長安花漸稀。諸憐雙玉羽，不共鳳城飛。  
客邸嗟燃桂，鄉心畏擣衣。阮家兄弟好，遲醉竹林扉。

潘少承移居同里間過小飲

僦居同里閑休假得經過旅客親燈火閒門掩薜蘿風  
沙銅狄近雲氣日華多試問王孫草歸來興若何

司徒俞公挽歌

淮甸曾專席邊庭舊倚烽勞深蘇屬國名重鄭司農末  
路收奇駿中原失卧龍感恩門下客絮酒阻扶筇

臺中俄解印海上托求仙樞筦逢明主金貂起暮年  
途長孤劍在恩重一身捐不藉麒麟畫千秋月旦傳

丘民部謙之招遊崇善寺得湖字

遠近皆消意清遊自不孤塵途淹歲月客思渺江湖麗  
句裁芳蕙清齋供野蒲一龕饒水竹端合老潛夫

至日子鳴再過

頭戴小烏巾閒遊逐市塵到門風雪暮劇飲性情真坐  
久因行灸羹稀祗憶尊君卿解唇舌得似好玄人

安茂卿過訪因贈

蓬扉餘夕照疲馬倦寒冰割炙逢王粲登龍媿李膺清



言心已醉文賦爾兼能未論青萍色連城價轉增

鄭伯良携趙子昂宋克溫真蹟見示

翰墨前賢在懸金不易求登壇稱二妙破塚閱千秋雅  
好憐昌歆窮途哂敝裘櫝還雖可恨已勝夜光投

遣力還家

阿段南歸去能攜尺素書世途同草莽行橐易蕭疎故  
國新羣豕殘經老蠹魚因聲寄松桂東海欲移居

聞海寇入高涼陷屬邑悵然有作

軍中飛檄迅天外，跼鵲遙料敵。書生短平時，將士驕百城。連赤羽，一歲少青苗。縱有明珠在，無緣獻聖朝。

春日集思伯宅

春色燕山淺芳菲，已不禁雪飛。猶作態雲起，欲成陰。無計投簪紱，相携就竹林。樂遊原上客，能服少年心。

寒食前同童子鳴安茂卿僧普紀遊郊外

懶出東郊路，因逢日稍暄。暮雲低古堞，流水避山門。麥飯澆中野，尊醪賞近村。因思故園夢，黃犢繞平原。

郊遊後同潘光祿孫上林童安二山人過朱在明宅小飲

踏徧荒郊路歸同促膝歡入春衣漸減經節食猶寒野態銜杯出新詩秉燭看雙童吹小管明月下階殘

寄胡元瑞讀書真如寺

雙林成獨往蘿徑阻同攀詩卷叅蓮座經禪息樹間餘寒猶擁衲長日不開關若漸天池羽脩心起雪山

真如寺訪胡元瑞不遇

芳菲能幾日屢騎到閒門流水過經院春風鎖給園履  
聲稀戶外棋局置松根那得逃空去佳期獨負言

望湖亭遲童安二子不至

野亭將日暮湖水蕩空迴松塢明千塔雲山辨五臺聽  
鶯歌客枕摘蔬送春杯何處雙飛鶴翩翩不共來

下山別在明徵甫

青山不忍別况與故人違水上俄生霧松間漸落暉宿  
雲君借榻涉澗我褰衣莫逐桃花去聽雞入瑣闥

王亮卿將之塞上以詩見投賦答

徵書還出谷為有故人憐手版趨西府心期在北燕聚  
沙規塞外測漏報軍前不受風塵色人今似魯連

同潘少承陳忠甫過康裕卿訪童子鳴

已向桐廬卧還從燕市遊雲山携蠟屐風雪攬貂裘名  
以新篇重心緣古俠投黃花亦爛漫為照草堂幽

春夜同子鳴集少承館

向夕衡門掩吳中客子來長河翻月上斷柳逐風迴小

飲憐春盡繁花受晚開  
漢關吾欲去刻燭更徘徊

送孫少府之沁水

旅邸獨相親寧辭載酒頻  
貂裘為客久黃綬出關新  
綿上煙猶冷西河俗舊淳  
訟庭閒坐嘯亦勝走風塵

朱在明阻凍返棹暫泊都門輒詩往訊

十丈滹沱雪凝寒轉不禁  
遙憐迴客棹猶似戀朋簪  
高枕懸歸夢層城隔醉吟  
誰知倦游者一倍故人心

玉河泛舟別童子鳴

越客理歸裝春風思北梁  
風花渡水遠菱荇入船香  
落日催停騎清波寫靚妝  
燕山青未了相送意俱長

送吳孝父還真州

來往亦何求風塵自薄遊  
為文千賦熟行路寸心投  
木葉淮南暮家山白岳秋  
驚心解携易不共五湖舟

送何孝廉南歸

未獻長楊賦能高洛下名  
不嫌薪桂盡還戀采衣輕  
江路蘼蕪綠家園橘柚榮  
東林吾舊社回首問柴荆

王仲諧邀看芍藥

姚魏元同品開時亦未殘  
動搖因翠袖扶植借朱闌  
靜影燈前落流雲席上看  
夜來風雨至應恐越羅單

李惟寅集諸子貝葉齋予以病不赴

朱門成小築蕭散似清溪  
水石凌隸几香煙襲錦綈  
拈花憐昨夢藉草得新題  
絃管驚心處長安更向西

汝脩諸君見過

久客依人懶西行  
借草堂物情堪俯仰  
吾意在耕桑鈴



閣樓鴉近禪鐙落鴈光酒壚應可覓須恕阮家狂

喬啓仁後園丁香花盛開遲過同賞

君是含香吏花能作意開折來方玉蕊植下向瑤臺淡  
薄勻春色飄零入酒杯芳菲雖可惜不是故園梅

同邵長孺宿榆河

八千鄉路遠北上轉成遙暮雨停驂處山陵秉節朝館  
人羞野蕨行竈拾枯樵半百多羈旅關情獨此宵

曾太常召同張羽王邵長孺小集

涼風吹日暮曲水抱簷迴玉醴祠官送華筵海客陪卜  
鄰傷往事推轂冠時才花下頻傾寫誰言觸熱來

王敬美以遊京口諸山篇詠見示

謝公山水癖名勝往來經篋裏蕪城賦帆前瘞鶴銘餘  
酣窮落日遠興盡滄溟太息屠門客風塵兩髯星

故人招隱處蹤跡繼焦君

郭次甫  
隱焦山

樹色銜青閣江津帶

白雲飲猿垂澗接別鶴入山聞不是逢王烈誰能辨鳥  
文

同李陽穀袁進士暨兒琰夜集得峰字

萍水愜相逢春杯入夜濃  
宮雲流五色城雪擁千峰  
花月留飛鳥才名得卧龍  
殷勤此攜手霞外覓行蹤

送董生還海寧時欲以春秋疏上不果

草屨來燕市縫衣返故鄉  
叫閤心力盡垂橐路途長  
著論名堪老為園計未荒  
吾謀非不用君自愛滄浪

盛仲交自金陵至集于喬舍人小園

坐蔭涼雲好輕衣未覺寒  
月臨花樹午春逼鳥聲殘  
滿

酌秦淮酒新彈貢禹冠柳條時拂拭渾作故人看

榮昭德妃輓歌

名冠椒風日恩深桂殿前盛筐惟卒禮辭輦宿稱賢玉  
盃留朝奠珠襦秘夜泉華容雖寂寞龍綽表新阡  
女德輝彤管嬪儀肅桂宮瑤池雲自出湘水路應窮宿  
草霑晨露疎楊切暝風鳳棲遺澤在能慰九泉中  
素車遵廣陌丹旆轉墳園爵秩三宮貴威儀九御存苔  
堦凝古色松隧鎖黃昏祗有齊紈扇猶餘篋笥恩

祖道鳴笳引行塵疊鼓聲椒塗非昔日象服儼平生誅  
冊陳金印靈輶飾翠旌婉儀將舊德青史尚垂名

過田叔

促膝懽能幾還家路漸分我思湟水月君倚太行雲折  
簡開新醞探書得古人倫吾豈敢惟喜過黃君

人日屠田叔邀同盧西臺張明府屠光祿張孝廉

董山人小集

人日欣同賞禪棲七客來殘書留雪映高興待花催燕

越星方聚風霜鴈未迴淹留對紅燭便是百年杯

送彭稚脩還南浦

相逢滿坐傾人知衛玠清諸孫連帝胄五字占時名草  
綠還家路花傷滯客情詞人如物色寶劍在豐城

送田叔

暫下白雲曹趨庭有鳳毛行多携楚夾醉可讀離騷銅  
柱風煙迥梅梁海氣高驚心成去住能念舊綈袍

同梁公智過靈濟道院訪陳忠甫

一身經徼外千里涉殊庭暫憩登山屐閒携相鶴經水  
衣生敗壁書帶拂虛櫺但適沉冥興何妨笑獨醒

從張羽王借鬱林觀碑本碑在海州

謫君餘習氣翰墨尚留心輟食經淮海看碑到鬱林登  
臨應墮淚行坐每沉吟可惜咸陽市徒捐一字金

同莫公遠張羽王梁公智過道院訪陳忠甫

一探壺中隱居然離俗塵石幢陰過午花院晚留春俠  
烈心相許蕭閒興是真抽簪吾已老羨爾白雲人

書陶貞白十賚文贈田叔系以小詩

知從京口渡還禮華陽雲紫氣三茆館真言十賚文參  
苓誰解給鸞鶴可為羣豈是抽簪日歸朝萬石君

同張羽王梁公智步雙河菴堤上

憑眺非無地偏尋一徑幽風花過淨院蘆荻滿汀洲月  
漸中宵減人嗟兩鬢秋負羈將謫宦俱厭五陵遊

送歙僧大海真了遊五臺

結伴西遊去靈山似竺乾錫飛千嶂頂燈現五峰前辛



苦頭陀行平生佛國緣若論心印在還問海南禪

吾無亭為丘謙之賦

亭舊有空同少  
谷二先生留題

瀑直常經此為園亦在茲隱偏金馬籍地即縉雲司苑  
樹常分色宮鶯或借枝祇應蘭省客來往洽襟期

詎意風塵裏還將一壑看浮沉操案牘懶慢著衣冠長  
嘯應懷古端憂更倚闌耽奇吾亦爾不是戀微官

密竹千莖翠幽花一徑迷閉門初散吏倚樹更分題賴  
是官曹簡能將物我齊杜陵多遣興長釣浣花溪

當代文章伯裁詩畫省中風流今不見丘壑得無同翰  
墨虛留壁蘭苕失舊叢憐才惟郢客灑淚此亭中

送梁公智移官吉州

懷祿非吾願移官肯歎嗟鷺洲迎解佩螺水憶乘槎夢  
寐銷丹地行藏問酒家拏音一回首紅發滿溪花  
握手平生好青雲幾客途馬空疲皂櫪人漸老屠沽詞  
賦名何益絃歌計撓蕪飄零壯心在龍劍未全孤

應妙寺即白塔寺僧慧乾居之

杖鉢携來久香燈靜院偏栽花成野徑接竹引春泉支  
遁遁遙論天台止觀禪坐來忘妙說塔影掛窻前

護國寺以居僧之使遠國者中有趙文敏碑

漢家勤絕國檀施表奇觀梵品從天竺真僧是法蘭護  
碑龍首缺巢棟燕泥乾不見金繒出關門用一丸

雙塔寺興隆寺別院有金党元英碑今廢為內教

場

長安開甲第舍衛接王城古佛旃檀閣將軍細柳營燈

殘留說偈碑半減題名此是紅塵地輪蹄終日行

能仁寺舊藏有樺皮梵經字甚精鑿

遊人方舍俗釋子復開關白拂支頤久清言酌茗閒書  
難窺豹管墨是出雞山若杜毘邪口誰傳出世間

洪慶寺馬尾松

亭亭垂翠蓋趺坐一僧來梁棟非吾事青黃是木災枝  
連拂衣石涼蔭譯經臺標散拚人棄摩挲媿汝才

法弘寺建新城時闕地有僧涅槃龕中其形如生

即寺僧也

浩劫知何代長林過客迷不知今壁壘猶是昔招提定  
裏人長寂花間鳥自啼醉來惟荷鋤岐路任東西

天寧寺有舍利塔僧道衍曾隱此

青青千栢林隋唐留至今佛光時隱現塔影半晴陰草  
細經遊鹿庭閒演戲禽機心刊落久那復異人尋

發長清縣

丹梯初引興愁絕赴前期未蠟登山屐先題望岳詩停

車松日下解帶麥風吹萬里遊今始抽簪恨苦遲

蘇公亭

謀生本業屨豈意學逃名千金兼束帛無乃故人情鑿  
湖從此遁蓬門空自扁潮中有蘭芷俎豆共芳馨

遊顧玄言二泉山亭二首

塵土夢初醒招尋得此亭泉分雙井練樓入四山青倚  
樹方成偈烹茶舊續經異時雞黍約風竹細來聽

誰解捐塵網煙霞共一欣引杯承竹露展簟接山雲丘

壑應忘我魚鳧正屬君扁舟從此去漁釣幸相聞

朱明洞

乘蹻入清都居然景氣殊  
泉聲迷遠近松籟答虛無  
神室留丹火仙家閟玉壺  
冲騰已遲暮物色待潛夫

青霞谷

霞外昔沉冥松篁尚匝青  
橋邊逢洗鉢石上記繡經  
一壑專名勝千秋更典刑  
偶來忘絮酒長揖謝山靈

黃龍洞

秀甲朱明外何年闢草萊懸蘿千磴暝飛瀑二樓開采  
藥應迷屐翻經尚有臺相期看日出雲氣在蓬萊

飛雲頂

飛步上巔屹星辰漸可捫一山浮海至五嶺此峰尊元  
氣迴陰洞丹霞闢妙門從來塵劫外別自有乾坤

答鄒方伯

共賦燕臺月佳期得重尋劇談當世事推轂昔賢心盡  
省開文苑青衿列道林時艱思共濟吾待拂朝簪



答孫觀察

入幕吾何敢寒宵重有期披雲占藻思零雨見新詩弭  
棹滄江外懷人落日時歸鴻如報客春在萬年枝

冬日樸華堂開社招君肅寅仲公補少仲仲登公  
紹開先諸子

北郭曾招隱深留水石蹤蓬蒿憐二仲文史入三冬霜  
徑初封橘寒畦晚摘菰故山吾不負琴酒許相從

潘子遷過樸華堂待月梁士哲繼至

三徑蓬蒿在風流二子過狂來忘我懶坐久覺情多竹  
下黃花酒風前白雪歌徘徊還秉燭明月待羊何

朱貞吉孔陽昆玉以予校刻復古編有詩見訊奉

答

天祿歸來日誰知四壁空技應憐刻鵠文不悔雕蟲副  
墨名山在餘生雅尚同何時捉談麈披寫對興公

萬里乘風卷送友人北上

握手念將別清尊尚未空離心懸嶺樹客路值秋風鵬

駟搏南海鴻儀會澤宮甘泉多侍從誰為薦揚雄

壽黃母六十一初度

喜際嘉平月奇齡六秩開萱花凌綺樹慈竹映春杯絳  
節排雲下金書附鶴迴潯陽正清淺紅日莫相催

潘子携酒同歐氏諸子過清泉山中出吳箋索余  
拙書因留夜坐

通家稱孔李聯騎問幽居性洽高陽酒名慚大令書行  
吟隨一鶴風雨待三魚十載塵纓解煙霞禮法疎

澹臺子羽墓

臨河聞返駕高第乃南浮行徑無芳躅松楸餘故丘山  
川良不改吾道日悠悠誰憐卑薄地千古有麟遊

友人惠菊夜至

柴桑雖久卧三徑未曾栽海上封書至籬根帶雨來繁  
霜吹短鬢紅燼落蒼苔縱是相逢晚猶勝二月開

七夕同陳任夫高正甫麥仲張林開先舍弟惟仁

姪璘集清居得燕字

閣道雙星過虛堂暮雨懸清歌聞激楚寶劍憶遊燕  
雁下沉秋色螢流入野烟詞人方接席應不恨華年

採石山人稿卷七

欽定四庫全書

瑤石山人稿卷八

明 黎民表 撰

五言律詩

春草堂為魏甫作

謝公携屐處坐愛一池幽  
朱邱依蘭沱青山入蕙樓  
雲容開浩渺客思滿汀洲  
莫歎羣芳歇王孫正薄遊

尚雅齋為佳甫作

試問通侯印何如樂志園傳家為竹素入室有蘭蓀玉  
度波千頃清吟月滿軒款門無惡客芳醴正盈尊

同丁計部諸子集王鴻臚山齋懷五岳之勝得高  
字

名山誰歷徧揮麈亦稱豪巖壑驅詞古風雲入望高金  
光遙可掇藜杖肯辭勞援鶴應相笑馳煙待爾曹

顧鴻臚諸子邀同丁計部遊玉河堤上得明字

久作塵中客閒從堤上行輕風花外度殘照雨邊明趨



事聯三省遊蹤媿二京當歌聊駐馬輕別若為情

重陽後過沈純甫同艾蔡二曹長小飲

偶爾襟期合相携坐竹根霜華猶滿徑風葉漫開尊故  
國飛鴻斷長途老馬存非君慰寥寂誰解掃行園

送楊叅軍

謝家傳玉樹傾蓋即依然諫草猶存笥琴尊半在船蓮  
花分幕靜楊柳挂帆偏若是過牛渚長歌夜月前

送黃孔昭

千山初落木歸客興偏新  
樂餌經秋減蘿衣似舊貧  
侯門無左席漁艇有閒身  
到處堪棲泊原非失路人

答蔡伯華刑部

衡門方晝掩特枉法曹過  
良晤尋難泰秋風入薜蘿  
名山思裹足烟雨憶披蓑  
不為沉冥久逢君白石歌

同姚伯子黃定甫邵長孺李季常遊甘露寺

高閣生遠興飄然在五湖  
暮雲低不散遠樹近看無  
說偈叅蓮座遊蹤渺玉壺  
長天一回首唯有月明孤

題遲賢亭靳仙筆跡

白雲飛不去擲筆此亭幽  
星宿垂芒在蟲魚汗簡留識  
奇空白首招手即丹丘欲展青氊卧荒生霹靂愁

過顧叔潛得題字

幽尋不在遠吏隱占青谿  
鄉夢銜杯失新詩摘葉題螢  
疎經雨亂花好傍人低日出銅街靜猶能散馬蹄

送胡山人

懸壺誰解識負笈且歸休  
招手丹丘近搖心白岳秋蟲

魚窺秘簡虹月傍行舟回首風沙地逢人笑黑裘

詠匏冠

苦蒂纔堪摘良工巧斲成不知蟬翼貴寧讓竹皮輕束  
髮禁霜冷穿花滴露清終焉慚戴鵠還有著書名

送唐惟良之廣陵二首

邗水遙通海乘槎復此過兒童騎竹在鹽鐵算緡多市  
估帆檣亂人烟島嶼和徒勞君莫嘆留興在滄波

才名餘盡省吏隱得滄洲汀草生春色漁歌喚客愁疎

燈京口渡孤刹大江流試問觀濤處詞人幾度遊

送蔡伯華之閩中

出處幾人異非緣薄省郎交情異貧賤世事有滄桑煮  
海窺鹽筴題詩出射堂流年堪自惜何用嘆浮湘

過天寧寺僧寶檀方丈

曾有黃金地誰為苦行僧仗經行路遠采藥入雲層一  
食伊蒲飯長明石枕燈不依禪宿去頭白已無能

野外芳華早何妨策杖尋草深垂井口碑卧古壇陰高

坐惟尊足清齋尚攝心  
給園留賞處還似阮家林

送黃清甫偕顧舍人遊滇中

舊好如禽慶名山得共陪  
洱河神禹導路箐蠻王開冠  
帶名家子登臨濟勝才  
關城雄劍閣應待勒銘回

聞故園草閣火

架上餘千軸俱隨綠燄飛  
平生惟蠟屐舊物祇牛衣  
信是冥懷待誰言損讀非  
嘯歌聊復爾北叟可同歸

同顧鴻臚兄弟過王鴻臚宅永上人在焉

委巷多車馬還因典客名鄉心燈下盡談麈坐中傾徑  
草抽新雨風絲漾晚晴歸舟應可問春浪此時平

鄭伯良邀同諸公登萬佛閣

日送鶯花去風雲興可乘塵心攀閣遠野興入林增龍  
樹棲孤影蜂房颭萬燈若無光祿酒春思杳難憑

市中得舊琴囊而予無琴也

錦樣已模糊何時混世沽祇餘空索在多半古音無携  
可緘詩草閑將覆局圖勿言無所用五石汎江湖

金定四庫全書  
冬夜同張元易過顧叔潛得紅字

櫪馬苦嘶風徘徊戀竹叢寒聲御溝水月色建章宮小  
袖禁花艷衰顏借酒紅他年文字飲能復憶城東

過范子宣觀王生臨帖

用意頗精勤毫芒細細分春絲抽獨繭驚電出重雲携  
我青藜杖書君白練裙長安應紙貴餘子但紛紜

送陳從訓還丹徒

河朔銜杯日蓬萊奏伎遊寸心酬國士片語遜名流衣



濕離筵雨帆開驛路秋南雲正翹首一鴈下蘆洲

寄陸無從

不為憂生產誰能廢嘯歌談經須歷下貸粟少監河秋  
雨生黃葉寒江擁白波不知蓬室底玄草近如何

寄李季常

才名空落拓詩句轉清新推轂無先輩論交見古人思  
君淮水月攜手蜀山春不是逢沮溺依然又問津

雨中奉訊唐惟良

帶印無多日前期遠見尋搖心雙闕下理棹五湖陰客  
邸嗟燃桂朝廷有賜金蕭條黃葉裡休憶白頭吟

同左轄郭公過廣濟寺

左轄中朝貴空門物外遊白雲邀入寺紅樹引登樓積  
雨逢新霽鄉心值早秋相酬無麗句誰解識湯休

郭方伯應宿至自南中止廣惠寺同劉觀察仲脩

携酒奉訊

未覺雙峰遠方營一日閒旃檀入古寺雷雨過空山苔

滑停車處風生捉麈間禪房寧久住人望在朝班  
南中無信使竹下有行蹤豈謂天涯遠還於佛國逢解  
衣停暮雨聞梵報疎鐘世事悠然裡寒暄已自慵

劉觀察園亭送唐惟良還揚州同歐楨伯作

省署昔攀援衡茆更接連藤蘿猶迸月池沼欲分天作  
賦人投楚登臺價在燕一將搖落思銷盡綠尊前

題張山人子嘿孝思卷

已向滄洲老還從燕市遊行藏丹檢在風月錦囊收搦

管雲生紙披衣雪滿裘江湖千里夢猶憶到松楸

贈醫士姚允升

蚤年耽內學一室事醫王  
薊子傳仙術桐君與藥方  
終朝常扣齒一榻自焚香  
若訪丹砂去雙鳬問草堂

大司馬東沙張公挽詩

故老三朝盡芳名一代尊  
麒麟身未盡丘壑道終存  
赤水餘篇翰丹霄投夢魂  
千秋文塚在榮耀竟誰倫

典午餘勲伐中朝尚典刑  
書能窮左史文竟薄玄經  
紫

氣終難翳滄波逝不停疎才慚許與頭白尚飄零

讀書樓為曾陽白先生賦

風月昔登臨丹梯尚可尋青藜天祿閣白雪郢中吟几  
席嵐霏濕軒窗露氣深琅然雲水外猶是鳳鸞音

錦標軒

錦幟中流得泥金上國來衣冠通兩世星象接三台題  
柱荆山積雕楹漢水開桓榮稽古力千載復論才

西圃餘清

野望通雲上衡門在水西  
騷人寡薜荔遊客唱銅鞮  
橘樹千林遍桃花隔岸迷  
鳳毛霄漢在垂釣任清溪

哭徐子與六首

岳牧才名大中朝禮數優  
天文垂左轄風誼起南州  
羽衛森開府江山自倚樓  
璽書雖未下為政已風流

詞場應冠絕心匠亦無能  
崛起無前輩雄飛值中興  
浮沉玄理勝時俗吏才稱  
往事穹碑在千秋下馬陵

蒼蒼不可問嘆逝每如斯  
豈意長安酒為君永訣時  
鴻

都今絕筆大雅久無詩不獨風流盡文章屬數奇

無書纔幾月委蛻得非真道喪應歌鳳吾衰更泣麟簿  
書聊偶世時命僅同人醉墨縱橫處星沉雪水濱

訟牒常移少高齋日掃除故人無政府門客滿公車酒  
德應堪頌官箴亦未疎汝南多賦客猶是大風餘

中原稱五子附驥亦紛紛國色應殊衆清言獨見君不  
逢非漢識垂老見雄文淒切隣人笛長安醉後聞

林計部德基同丘使君謙之陳山人汝信自通州

泛舟送予至潞河

賴是官曹簡何妨勝事偏金章叅野褐青黛倚樓舫宿  
鷺驚人起殘虹傍雨懸空江迴騎吏留興綠尊前

別丘謙之以蘇晉圖奉贈

豈謂逃禪者臨岐欲別難昔聯東省玉今佩楚江蘭落  
日催迴舸春風岸客冠披圖見顏色何異屋梁看

贈顧舍人

東閣多奇士文章未陸沉詩言自匡鼎家學得劉歆出



入清華地翻飛翰墨林交情元竹下況乃接朝簪

鷓鴣適齋為朱張水文學賦

一室蓬蒿下清齋似杜機但求棲息穩不恨稻粱微喜  
客開山笥乘閒款竹扉山川一何廣黃鵠待翻飛

同謙之丘使君自天寧寺騎至西湖上

欲送殘春去長堤日已曛村舂隔水遠浦樹到湖分惜  
別貪攜手行吟獨共君莫驚沙上鳥飛去各青雲

龍潭

何年龍已去野色澹荒陂元氣迴深洞陰風出古祠探  
珠尋赤水沉璧問清時收豎猶回首千靈訪具茨

宿瑗上人房

久客應難寐中宵獨據床心無蕉鹿競夢已路遙長曙  
色齋鐘動行厨野藪香更衣問前路惆悵別雲房

功德寺牡丹

一徑交深竹千叢暗野堂碧疑天女唾花是佛王香絕  
艷休相妬佳期不可忘飄零一杯酒長嘯望西房

華巖洞有耶律楚材故桓夏公石刻

深壑因誰造揮斤亦有神江山留王氣

耶律詞云江山王氣空千載

題詠待詞人泉作窻間雨苔生石上塵  
碧紗籠底墨蕭索竟千春

望湖亭

層崖出天半應接頗紛紜山合溟濛雨湖通來去雲  
春風吹桂棹野日散鷗羣一片江南色吟思越鄂君

酌玉亭上

登山方改屐把酒愛臨流龍去還成雨風鳴併作秋開  
奩鴻照影弭蓋鳳經遊絕勝頻來往甦甦笑白頭

同謙之午憩金口寺石榻上

濟勝心無已看山日暫停夢回雲屋冷衣藉石床扃佛  
境看如幻塵途笑獨醒僧房無所供亦自遣沉冥

慰慈上人墜馬

經禪不出戶山色舉頭新絕磴應妨馬危途轉畏人塵  
勞余裹足電路爾觀身莫更生嗔惱西遊本宿因

丘謙之下碧雲寺予往香山兩作速歸

出谷應疑早看山欲去遲日斜人影獨林薄鳥聲悲咫尺猶相去逢迎重有期不嫌騎馬倦難和碧雲詩

同鄔汝翼黃清甫陳崇訓汪公幹李季常過焦山

訪郭次甫

釣鼇生遠興歌鳳上高臺海氣風吹斷江流樹引迴莓苔行徑滑鐘梵寺門開如此佳山水生涯幾度來

桐廬道中寄謝侍御

有美吳山水星軺罷命新濤聲驅海曲風采肅朝紳入  
社推高足追班泰近臣未酬虛左席長媿報恩身

劍氣凌東越奎文映紫垣人倫開藻鑑禮數起龍門白  
髮存知已丹心奉至尊漢庭如物色虛薄詎須論

答隣止少侯

高步誰能似名駒本帝家向人操白雪投跡寄青霞賓  
榻頻開醴山窻屢試茶清言疲夢想叢桂又開花

與梁少仲林開先汲古亭夜坐

歸來無所適，剩有草玄亭。  
巖溜千絲滴，雲蘿四壁青。  
燃燈聽佛偈，酌酒試茶經。  
若論浮生理，惟知醉與醒。

少仲開先過宿山樓

數過爭懸榻，乘閒就隱居。  
竹風披卧輦，松火照山厨。  
遠夢覺幽鳥，清神把道書。  
長歌雲水外，豪氣不曾除。

石羊館為郭學憲賦

一室類安禪，銅梁策騎旋。  
試看持節日，猶似下帷年。  
花氣迷春島，藤陰覆玉泉。  
清吟不覺夜，月在石橋邊。

歸田雜咏十二首

一雨淹晨暮閒居似避喧鄰人難假蓋樵客少過門脫  
粟應妨罄殘書懶自翻本無經濟術藏拙在乾坤

近卜城西地新畬漸可耕耰鋤課童僕豐儉付陰晴白  
水分畦映青煙冒壠平蕭然茅屋底無力謝生成

一丘堪偃卧暇日掩柴扉山果垂藤熟林鶯接翅飛春  
風難再得世事況多違但坐南窗下休論昨日非

頗怪頻年事江湖屢滯遊王程妨野寺身世落漁舟徒



費千金使空餘一敝裘素絲雖可嘆知足亦何憂

鵬閣曾三入龍門幸一登散才當藝苑妙語屬山僧交  
態看貧賤榮途有愛憎機心今已矣穩卧玉山層

家傳餘萬卷世故半凋零雖識數行墨終銷兩鬢青人  
多矜敝帚世復笑玄經但飲尊中酒勝於案上螢

久欲遊衡岳輕舟信所如川程限楚越生計繫樵漁未  
種龍洲橘先馳汶嶺書四愁無處寫勝事恐成虛

浮丘吾郭近策杖屢經過神室無留火滄溟有逝波靈

蹤天亦秘遐舉事如何乘僑非吾意空悲去日多

豈謂歸田拙幽居事足娛蟲魚詮古刻山海詠新圖名  
已落朝藉身當隱市沽雖無鄉里識亦懶著潛夫

苦憶平生友憐予頗好奇能供光祿酒常和法曹詩宦  
拙騎官馬朝回補竹籬風塵闕塞黑魂夢故來遲

短衣殊入宋憑軾似經蒲宦轍十年有鄉書累月無推  
轂廟廊在歸山酒伴孤白頭惟強飯亦足慰長途

自卜三間隱寧多二仲賢王家甥舅易何氏弟兄禪琴

酒中年輟江湖遠夢懸浮雲爾何物不似淥尊前

西莊遲梁少仲林開先過訪

林霏將欲斂瓜地正堪耘隔竹頻呼酒開軒一待君  
欸音出浦遠人影過橋分莫謂餘西日臨堂見碧雲

二妙聯鑣至塵襟頓覺披山風吹薜荔野日澹茅茨  
浮白君能醉還丹我較遲莫論風共雨俱是入林時

梁少仲林開先招遊西池泛舟

歲月欺人得乘閒只浪遊看花迷浦口回棹泊沙頭  
細

雨孤村暝涼風野樹秋無心論去住雲水共悠悠  
近出循西水中流具畫船清遊藉朋好適興任江天鱸  
落金盤細杯行野割鮮當壚憐少婦不解惜華年

同趙太史遊羅浮宿冲虛觀

寒宵無擊柝把劍起鷄鳴紫閣浮生夢滄洲獨客情風  
迴瑤室響雲去鐵橋平何處叅差發乘鸞朝玉京

龐太守湛別駕招同趙太史周明府葉刺史祁孝

廉張茂才飲青霞樓

五馬能供具關門駐使車飯香抄白石酒味瀝丹砂入  
幕風初起板林日未斜笙歌臨路發歸去葛洪家

同趙太史諸公過葉刺史石洞

憐君專一壑猶是俸錢餘澗水鏘鳴玉雲蘿引曳裾山  
都能送酒木客解窺書予亦瑤臺客過逢兩鹿車

同諸子憩玉女峰瑤石臺下

飛雲煙霧裏流水自潺潺一片瑤臺石飛來積翠間月  
應臨曉鏡風為敞玄關玉女休相笑予方鍊大還

黃龍洞聽趙太史與諸生講學

釣鼇遺舊跡水石有黃龍使者乘輶至諸生挾筴從晨  
餐長白粥夜坐石樓鐘詎意風雩樂還於世外逢

水簾洞畬人獻酒

暫憩雲門外冬衣亦尚寒風煙詞客賞薇蕨野人餐白  
雨懷中落殘紅島外看臨流何所羨吾已挂塵冠

王鷲峰有鉅石可隱趙太史題曰千丈厓

翠削逾千仞嵌空若二陵下方雷雨合陰洞鬼神憑起

坐心猶掉艱危氣益增何人劉石壁文字暗蒼藤

朱明洞見梅花

南園多嘉樹繁花舊有村天應留絕豔仙為返香魂雪  
後深緣壑風前半掩門一枝難折寄惆悵到黃昏

社中諸公懷予遊羅浮歸而奉答

名山期獨往采藥不同君夜聽羅浮雨心搖桂水雲風  
塵終自遠鸞鶴可為羣惟有東林社齋鐘詎復聞

同李季常汪公幹過林開先草亭

萬木俯城闌空亭絕四鄰竹清娛永日花發占殘春  
認草成書帶行疏岸葛巾衡門常晝掩時過好奇人

浴佛日同汪公幹李季常鄧君肅黃公補梁少仲

林開先過小東林

隱樹為蓮座鳴螺集梵筵不知成佛後猶記下生年  
義豈因文字心難滅世緣閒來林下坐亦是小叅禪

淨業無多地經禪只五君襟期同月朗經卷借蘭薰  
蘇晉猶耽酒周顒久絕葷縱然離世網終未斷知聞



宿端溪口

風煙猶故土信宿亦長途  
水遶羚羊峽山藏明月湖  
平沙漁火亂遠戍角聲孤  
津吏休相問滄波一釣徒

同梁思立鄧君肅梁少仲林開先宿梅庵

名山宜結夏亦自斷塵情  
支竹同僧懶煎茶愛水清  
石間移席坐松下挾書行  
但愜浮生興無憂佛不成

贈聽上人

移住端溪寺還因古佛緣  
梅花清倚閣野水細通泉  
夜

續傳燈偈貧資賣藥錢壯遊君不見來此十經年

爛柯山

白石經時爛仙蹤豈易尋但傳看奕去不記入山深  
觸悲人世滄桑閱古今丹砂君莫問對酒且披襟

八賢祠

萬里南冠客生涯老瘴溪庭荒新薜荔階長舊菩提孤  
憤堪填海遺蹤獨杖藜暫來無絮酒淚落楚雲西

舟中讀泰泉先生文集

光岳留遺草功名逐逝波祥麟悲魯史孤鳳避雲羅一  
代風流盡餘生感慨多夜臺今拱木吾敢擬西河

新邑

本意通茅簷誰知摧釣舟野田荒穰稔山木叫鉤輶轉  
餉懸孤戍開邊實隱憂槎頭成穩坐浮海任悠悠

同諸子舟中小酌

不為江魚賤誰能觸熱來竹枝驚怨女萍水共深杯古  
堠西江上層城北斗隈浮家何日定又棹酒船迴

返棹

歷險因乘興經遊亦故鄉江天足風雨人事有悲涼海  
燕歸何早沙鷗下不妨舍舟從此去花竹近茅堂

鄧山人招同鄒令尹黃少叅黃令尹張都運郭學

憲遊六榕寺


古寺何寥落榕陰故不迷薜蘿心共賞琴酒日相携霜  
樹經龍卧雲房避鶴棲興來成徙倚紅葉正堪題

塵勞捐世網放浪得閒身座上青松塵林間白葛巾看

花驚爛熳對酒肯逡巡香火思前事追遊是宿因  
生涯能幾度登覽記吾曾地擁青猊座行逢白足僧中  
厨供茗飲四壁照蓮燈莫更思身外隨緣亦小乘  
塵中遺妙境樹杪并朱闌萬象披雲出孤鴻背日寒艱  
危予側足騷雅爾登壇回首煙花地臨風一笑看

養拙樓為潘子朋賦

萬象臨觀盡三山結夢遙平林朝捲霧曲浦暗通潮偃  
卧從書嬾塵勞仗酒銷空中下鸞鶴雲氣故飄飄



瑤石山人稿卷八

欽定四庫全書

集部

瑤石山人稿卷十九

詳校官監察御史<sub>臣</sub>曹坦

中書<sub>臣</sub>劉源溥覆勘

總校官編修<sub>臣</sub>王燕緒

校對官中書<sub>臣</sub>吳甸華

謄錄監生<sub>臣</sub>周世芳

欽定四庫全書

瑤石山人稿卷九

明 黎民表 撰

五言排律

登六榕寺塔得微字

寶鐸搖青漢金輪逼紫微  
衆香攢繡栱九級敞瓊扉  
仙樂飄空下天花襍雨飛  
萬形紛翠嶺千仞轉高巍  
檻頻霆相激櫺開月吐輝  
侵雲看樹小入海見山稀  
側足應



防險觀心擬息機永言齊浩劫更拂六銖衣

賦得臨池柳

春色方駘蕩霜華詎見侵縈堤輕縷結拂水亂絲沈搖  
落還同絮蕭疎不作林籠烟無遠態障日少繁陰夕鳥  
窺巢入寒蟬抱葉吟長因離別盡非為笛中音

詠秋雁得頻字

風烟遶柳塞霜氣愴蕭晨度險追飛急凌空顧影頻沒  
雲還結陣乘霧正迷津乍起搖邊思長鳴逐旅人稻梁

翻累性增繳獨防身不及雕梁燕銜泥遠見親

遊東山真覺院

鹿園披絕徑鷲嶺逼諸天樹杪驚新瀑花間滴暗泉寶  
輪承曉日金鐸韻秋烟戒具蓮花捧經文貝葉聯地從  
初叔造僧是幾燈傳住想猿心伏忘言象教詮東遊誰  
小魯北望我愁燕願就靈巖宿餐霞度世緣

夜半聞山鐘

何處傳飛聽霜鐘應律鳴四山雲共起千里月孤明斷

續緣深澗飄飄滿太清  
閉關僧始定翻露鶴同驚  
浮世多昏夢冥棲豈俗情  
阮公稱放達始得聽鸞聲

同李棗陽遊七星巖

作鎮標鶉火經奇敞下都  
魁形連紫極岳勢奠黃圖  
地肺相盤絡天窓豁睽孤  
起龍擎寶蓋寫鳳帶流蘓  
氣象直能構陰陽巧作爐  
草長芝似玉松久石為株  
秘簡垂金薤仙床上綠蕪  
巨靈曾此劈疏屬有誰拘  
眺覽寒暄異登臨景物殊  
霞流出窈窕風至蒼虛無  
未返雷門鶴

叨從葉縣鳬洞如窺白鵠水似得玄珠苔碣開元在鴻  
才北海徂輕颺下松桂溟浸隱菰蒲槎泛思垂釣巖樓  
擬結廬暝烟分手處惆悵失蓬壺

奉陪泰泉先生遊棲霞寺

妙剎開山久重新選勝偏憶從初地後誰辨劫灰前虹  
澗交簷際龍岡落座邊橋危妨度馬樹密翳鳴蟬平野  
看人小長空見鳥旋追遊寧寂寞披豁得儒玄塵跡吾  
增感幽棲性所便芳尊逢菊日興極對霜天

答黃汝弘山中見寄

宦遊心不愜，早歲即還家。  
一徑初栽菊，諸生已賜麻。  
賦能輕季雅，經獨重侯芭。  
詎意躋金馬，今將遁玉華。  
監河能貸粟，中散解餐霞。  
昔枉丘中贈，思余海上槎。  
滄波分水曲，明月共天涯。  
待訪曹溪日，幽巖覓桂花。

東溪別業為李鍊師賦

璇流何窈窕，琳館帶重深。  
大隱雖朝市，清風自竹林。  
泉光霏素几，霞氣襲幽襟。  
騁望金樞外，紆迴瑤水陰。  
理能

窺止足性本狎飛沉落月乘舟往微颺擊汰唵詎須探  
秘寶自覺遠蓬心柱下終豪舉浮丘將見尋玄珠君莫  
惜白髮我先侵異日逢黃石飛鸞早寄音

脩復山中舊社

寥落空山裏當時結社蓮吟尊移竹外釣舫落池邊草  
奏三千牘追遊十八賢雲泥憐鵠舉歲月隔鸞箋猿鶴  
看交態烟霞愴結緣樹猶江揔宅耕是汶陽田往事成  
陳迹今吾豈故年還憐稽呂駕同在夜燈前

奉送座主大司徒馬石渚先生還南都

淮海聲華峻孤卿地望優經綸明主用性術古人求鸞  
鷺爭先翥麒麟獨晚收長沙從偃蹇炎嶠詎淹留共治  
資長孺相迎得細侯輜軒恣歷覽井邑變謠謳重以紆  
籌遠還將賜履週威稜加赤電羽翮在高秋氣色干星  
象班司切冕旒引經常獨斷焚竹豈窮按虛已推朝議  
清衷徹睿眸萬方虞大計一德倚深謀飛輓踰青海瑇  
琳積介丘歲時私藏竭動輒大農憂剗削皆全及操持

實巨舟名高諸老遜契合五臣流閉閣耽玄默清關抵  
靜修魏多調水旱謝每鎮沉浮盛業今誰繼為文更不  
休譚詩宗馬鄭擗翰捷應劉藻鏡咸瑩徹詞場屢校讎  
微才叨盼睐曲木荷雕鏤碣館嗟垂翅梁園厭薄遊永  
言陪讌席長得奉清酬轍洄波空蕩途窮騁末由搖心  
隨几杖捐袂別河洲世事雲泥隔餘生日月道吹噓無  
狗監江漢有菟裘去去隨朱鳥飄飄偶白鷗願公歸鼎  
軸六寓奉皇猷



登臨清城新樓

樓櫓臨邊起旌旗蔽日翻衆山多魯望一水控河源直  
取巖城鎮應防敵騎奔戰間耕士樂時遠霸風存迴眺  
山川異煩憂鼓角喧嗣宗偏引恨平子易銷魂老去無  
長策春歸憶故園帝鄉何處是愁望且開尊

寓朝天宮道士館作

昔在宣皇日垂衣挹大庭陪京開峻宇劃地限嚴扃  
館即藁霄敞居惟百聖寧雕簷行日月繡闥駐風霆海

岳驅群象金銀役五丁齋宮虔紫極法駕導青冥隱軫  
簪裾列都盧粉黛馨帝壇加檢玉天步振流鈴道自崆  
峒得言從河上聽理玄窮恍惚功大格生靈黃竹誰西  
母宮桃幾歲星慶霄猶掩靄琪樹不凋零備享遵時序  
追趨亟典刑御香分寶盖內酒賜銀瓶却老方能驗遊  
仙夢詎醒歸依成晚屣棲息感勞形華表懼猶昨玄都  
嘆屢經鼎分燒藥火案有讀書螢滯留應不惜願覩禪  
雲亭

出京師作

北闕心仍壯南冠思不禁徒勞三獻璧遂有五噫吟野  
老頻爭席家人屢問金窮途當媚景初服改寒砧駿豈  
高臺得鴻應滄海尋散材堪衆棄狂態向人深計轉妻  
孥失愁仍酒病侵干戈天地滿抵事憶山林

聊城夜泊聞揚州寇急愴然有作

殺氣朱方徙妖星太白低三江分部曲五月鬪鯨鯢箭  
滿蕪城郭笳哀邗水堤肉飛腥赤海炬列障丹梯紅粟

千艘盡青樓萬甲齊秋陰連斥堠白日慘虹蜺推轂漢  
庭上屯兵吳苑西至尊愁玉食諸將走桐圭東岱嚴軍  
壘聊城入鼓輦捐金空市駿拔劍起聞鷄鹵莽拋殘帙  
倉皇擁舊紼此曹仍跋扈吾計失羈縻樓憤欲逃東海春  
難假會稽冥鴻天亦礙老馬路逾迷衣食人相籍壺觴  
客為携河流驅黯淡月色助悲悽國事吞聲問鄉書掩  
淚題容身猶不定何處夜烏啼

沛上別子與明卿

騷雅論今代中原幾並驅捧心愁屈宋抵掌失楊盧一  
一風稜整森森法象殊雕籠掣孔翠玉勒歎神駒蕩滌  
開溟浸陰陽運巨鑪先鋒爭辟易歷塊不崎嶇歛自西  
曹奮終為俊國模徐公駮鄴乘季子騁吳都豈謂萬人  
敵還將二妙俱大庭羞絳灌厚祿笑侏儒白壁交游冷  
黃金氣色孤一麾分楚越雙涕渺江湖赤縣連烽火滄  
波挾舳艫秦庭何處哭漢檻待誰呼得喪皆行旅朋知  
到友于綈袍寒借問涸轍困相濡物論應吾輩山姿詎

世途君寧忘鼎軸我漸老屠沽河水竭夷徙浮雲芒碭  
徂離筵即此地後會恐榛蕪

滋蘭館為潘少承作

客有思玄者能兼市隱名幽棕含白雪逸興託孤英三  
徑初開就千藪自種成隨風香更遠入室氣彌清細帙  
霑餘馥瑤琴寄雅聲永懷君子德延望美人情霜霰將  
無變蓬蒿幸免營相憐同臭味持贈保堅貞

答金子坤

嗟爾孤蹤士吳門自隱淪千金輕破產雙壁不逢人丘  
壑堪藏拙交游反厭真狂來書擬聖醉後句稱神萬物  
從芻狗吾生任涸鱗青冥省意氣白眼在風塵感激嗟  
長缺飄零聚角巾亂離方此日握手重逡巡

寄懷歐楨伯

隱几衡門下居然厭薄遊蘭滋楚畹日橘熟洞庭秋三  
徑懷羊仲扁舟問子猷驪珠照海浦鰲釣落滄洲迹豈  
求田繫心緣攬桂留三冬殊物候一水隔離憂欲就南

州榻風烟伴客愁

婚禮述

九葉當陽日同時表震良翦珪元紹誦歸妹肇稱商乾  
象瞻雙麗天機儼七襄鳳輪停月馭龍戟導霞粧羔雁  
咸遵古芝蘭始毓芳金枝相隱映銀榜迭輝光率舞康  
莊溢傾心盛典揚卿雲歌八百千載贊隆昌

題楊山人隱居

紫邏雲林僻青谿徑路斜應憐招隱地况復草玄家藤



古蟠幽石松寒落細花山窓開卷畫天井上烟霞宅勝  
棲心遠憑高屬興餘圖書淹日月芝朮共年華雛鳳飛  
將奮冥鴻迹漸遐浮榮真夢幻悔不學丹砂

寄董子元

江都千載後槐里復名家日下無荀鶴人中識孟嘉封  
書寄羅薛投贈比疏麻泐瀆烽烟異羅浮道路賒玄珠  
君自抱青鬢我將華落月空餘夢寒梅未有花因風詢  
良覲何處上仙槎

寄答陸儀部

飄零吳內史投老在明時  
官豈含香著心仍執戟疲丘  
樊綜逸興鸞鶴蘊遐思劇地  
通書少深居應客遲筆圖  
窺鵠立文圓煥星披滄客新  
停賦頭陀舊勒碑人間虛  
物色海內佇光儀騰達空時  
輩風流實我師淵襟猶未  
挹清夢已先馳旅寓梁鴻懶  
淹留王粲悲舠舻失茂苑  
烽火起潢池典籍依何處追  
趨屢後期誰攀小山桂去  
采羅浮芝散木寧斲顧鴻裁  
獨見貽霧鳶雲外阻星鳥

日南窺神劍終當合仙舟許並移五湖空浩渺三徑轉  
支離強欲從公去鷗波理釣絲

寄朱子朗

念爾巢居子翛然遣世塵樓臺吳苑樹風月上皇人結  
駟心能淡携壺興屢真虎頭今傑手龍卧豈前身草長  
胥門道魚肥笠澤春思君烽火日千里為沾巾

送何太守振卿之潮州

風度看前輩交情已後期冰霜隨地遠旌旆出關遲海

上銅符守西曹白雪詞望深人易挹節苦俗難知暴鱷  
行移宅祥鸞慎擇枝陰將韓木遍春與召棠宜保障君  
留滯家園我夢思還因鴻漸羽跂望日南陲

送胡僉憲正夫之湖南

握蘭分省署委佩出承明節鎮羊開府風流漢客卿單  
車豪吏懾千騎遠人迎蕙葉薰寄服桃華引去旌山從  
五溪險水到九江平擊楫看今日觀濤壯此行廟謨資  
借筮遠興屬飛觥不遣荆南滯胡威有重名

送林僉事并丹之湖南

皎然青瑣客銜命望湘川廊廟談兵日樓船下瀨年草  
玄心最淡持斧任方專別路經芳杜秋風入夢田子長  
文賦似庾亮興情偏楚禊閑揮羽商歌起扣舷銘功思  
漢水圖像在凌烟誰念無衣客心隨越鳥邊

集許舍人稚幹宅觀舞

芳樹連溫室幽莊到習池白環猶相業青瑣盡朋知翠  
鬢花間擁金尊月下移宴遊成野客吟眺及良時物理

銜杯得鄉心觸景悲絕纓君莫惜顏玉更相期

兼隱亭為陸大理賦

憐君開淨業還在禁城西不厭官曹簡能將寵辱齊移  
山成列島汲竹代迴溪方藥桐君得壺觴蔣詡携幽深  
添意象朴畧稱羈棲所志存山水何心立町畦柳開當  
戶拂鶯好入林啼殘帙留螢照新詩摘葉題步雖從瑣  
闥夢或遶丹梯竹徑誰稱達花源我欲迷散朝常枕籍  
乘興屢攀躋慢世元方朔逃名豈會稽寒松方命酌芳

草忽相睽賦歸來日惹青覓舊蹊

重陽前一日同戴伯常姚元白歐楨伯過沈懋學

東城旅寓

野次招携得閒門少送迎枯楊村徑出殘芰水雲平藜  
杖稱居士蓮峰接化城雕菰畱客飯青李遜書名燈火  
曾天竺琴尊忽帝京干戈經慘愴歲月苦崢嶸辭統  
千金直龍淵片羽輕雖然朱履貴能免布衣情秋序黃  
花發他鄉白髮生縱橫憐計拙淪落賴詩成湖海扁舟

足乾坤一馬并茲辰無濁酒慷慨意誰明

九日遊菖蒲澗

五嶺仙靈宅霞蹤昔此留青驪迷碧海玉舄下丹丘絕  
壑紛瑤草飛泉帶藻旒探杯猶粵井拾翠有靈洲脩禊  
遺前事替萸萸勝流莓苔幾蠟屐身世一虛舟花沒劉  
王塢鐘寒趙尉樓顏齡湏大藥暇日恣冥搜結桂成延  
佇班荆共倡酬阜鄉知不遠雲外更相求

送泰泉先生赴召



堯文光萬寓睿德格玄穹八葉乾坤大三元歷數隆  
緋烟流黼座王醴降丹空揆日開蘭殿儀天起桂宮  
屬車思渭水仙駕意崆峒夢賚唯良弼朝推寔至公  
承華詒帝則毓德付天工宣室恩偏異銅扉禮更崇  
食萍甘素節獻曝耿微衷驚起瑤山上鸞遊蘭渚東  
圖黃思故武拾翠感殊逢職是司綸舊官仍掌諫同  
玄文偏集鳳藻思獨雕龍有美恢瓊度無私任樸忠  
風愆偏媿媿諷諭極冲冲抗法光前典陳詩邁古風  
五稱初紀烈三至永

垂洪飲醴昭餘澤為霖景茂功丹青麟閣上竹素石渠  
中竊駕應難弭鵬霄未易窮暫乘沙苑駿莫羨粵洲鴻  
朽質慙深獎殊私荷廓蒙服箱憐蹇步刷翮慕高翀離  
思縈秋杜愁心繫夕楓憑高聊引望佳氣正葱葱

泛彭蠡望匡廬山

碧落澄宵景平湖散暝烟縠紋初泛月珪采欲浮天候  
汐難迴櫂乘流屢扣舷水香蘭茝變沙縹芰荷鮮望美  
心無極搜竒興獨延地圖雄五嶺江勢束三川遠嶂芙

峇出衡波翡翠連霞標干斗上日觀抱空懸仙掌纔疑  
鑿丹梯斷復聯窻明開玉女閣遂貯金仙洒落松門下  
嬋娟石鏡前厓光三秀擢壑晦衆燈然烏藝雲中草援  
攀樹杪泉瑤翻知鷺瀉丹溜識虹穿桂父駭鸞至芝童  
御鶴旋既如紆赤水還似望青田未授長生訣先叅內  
景篇江津鳬舄阻霄漢鳳情牽勝果超迷筏歸依結淨  
蓮盧敖淹汗漫謝客罄酒沿願整雲中駕隨君戲九玄  
送楊都閩奉萬壽表入京

有美稱人傑蜚聲自海濱漢庭推驃騎晉室佐中軍獸  
錦榮新賜麟符策壯勲陣間收虎落戈偃晦龍文佩玉  
趨丹地揚旌拂翠雲幽花明杜渚濃柳映長雲重以脩  
途阻而憐別袂分金焱迴魏闕玄露下秋旻繞電逢昌  
序當陽瑞聖君絳幡清道引仙樂半空聞尊至傾堯酒  
絃調協舜薰羽林森攬攬象舞溢云云拜手寔初霽搖  
心日未曛禁中勞夢寐閭外荷殷勤擢雋才超乘登臺  
價逸羣恭承宣室召雅挹御爐芬稱慶將何以文思邁

曲墳

秋巖

江上矗諸峰奇觀不易逢  
波光濯翡翠山色隱芙蓉  
野曠餘烟斂川長積氣衝  
近窺龍虎麗遙帶鳳凰重  
丁令迴孤鶴邈君馭兩龍  
祇憐幽谷賞還躡逸人蹤  
發穴搜金簡疏流導玉宗  
雷承清露泣几迸紫苔封  
列籍隨原草披襟撫澗松  
鸞遊企霄漢鴻矯避矰量  
疲繭慙高駕逍遙命短筇  
丹砂如可學脫屣幸相從

文泉精舍為梁少傅作

靈泉何湛澹飛下白雲岑皎潔飄空色紫紆到海心慶  
源天獨委脩綆爾方尋漱齒含清馥為廬托靜深紫蒲  
緣近隰芳茝被幽潯石几輕霏潤山楹積翠陰桂叢歌  
隱曲杏樹送清音濠上抽玄緒丘中寄素琴終然聳巨  
壑聊復滌煩襟抱甕知余拙青門且陸沉

將之京師祇謁先隴述感一百韻

蹇劣慚脩步時髦濫廁肩端居心鬱鬱伏枕淚漣漣苦

調憑誰奏勞歌試一宣  
殺皇方鼎盛先子適鴻  
騫羔雁來多士車書混  
八埏扶搖輕九萬奏牘  
動三千駿骨寧輕市驪  
珠偶見捐祿微欣負米  
舌在且懷鉛坦腹人  
窺筭登堂客感鱣志思  
摧大敵力遂破中堅鸚  
鵡憐金絡驂駟飾錦韉  
置身當禁地清夢邇鈞  
天密勿咨三老追趨仰  
列仙羽陵紬秘簡石鼓  
叩殘編龍豈酬堅白雄  
應屈太玄大官供不乏  
伏膺割常鮮詎厭承明  
直還推季典賢匡時心  
獨在邁往氣無前脫距  
讒邪伏嬰鱗寵

遇偏赤九銷狹猾白簡肅貂蟬炎嶠西甌阻洪濤左蠡  
壩霜威三命重水鏡九流銓雲雨多翻覆滄桑屢變遷  
積薪甘晚達持戟備常員痛逼蘇耽井歸耕下溷田蕞  
廬堪偃蹇餅粟祇憂煎紆紕謀生拙泥途樂性全大臣  
辭汲引農父喜聯翩前席思遺逸中興秉化權嚴程趨  
瑣闥舊物擁青氈徇報思縻竭持身極治涓國資清望  
重庭倚直詞專縉典期增飾明祠肇被虔聖誠虛聽納  
時頗妬嬋娟日月羣飛伏昊穹尺霧纏磨牙競猥猥刻



木儼鷹鷂曠蕩恩難測纖毫青獲蠲抽簪謝朝列識面  
溢郊廛去去隨陽鳥悠悠貼斷鳶未拋廬岳杖須問下  
灘船果蓏渚園接壺觴蔣徑連犢禪暄自曝蠟屐歲常  
穿九薦咸虛左羣公舉讓先邴原甘効免鄭谷絕膏緣  
匪石終難轉無瑕抵用悛卞和愁泣玉莊叟悟忘筌藥  
餌扶衰疾丹砂協靜便庶幾凝綠髓將謂追華顛婉婉  
嗟何及幽憂遽不痊何辜來鵬鳥底事掩龍泉杳杳淪  
長夜蒼蒼昧上乾為山虧覆簣逝水閱成川劒舄猶如

故精靈若個邊峴山歡宴地京兆哭遊阡鴻鵠標松隧  
靈龜叶澗漚世家彤管勒名字翠珉鐫東海波終蕩南  
枝憤未填夜烏霜黯黯宿草露芊芊掩抑雍門曲淒清  
叔夜絃書空拚往事攬鏡惜流年舊德將淪蝕餘風異  
接聯為儒困抱慙失路懶施鞭壁以遺經授家惟素業  
傳暄陽仁杞梓芳潤被蘭茝月旦慙三鳳巖居蔽數椽  
門迎王子棹杖掛阮公錢隙地營鷄柵殘冬縛稻簑范  
塵從滿甌墨突任無烟抱膝空長嘯鋪糟只醉眠斑能

窺豹管翰或點魚牋屈宋遠遊賦王公大雅篇縱饒勤  
刻畫祇覺遜精妍多病怙如憲求聞恥效顓以茲懷寡  
特會見越拘攣一德咸昭格羣生舉在甄龍庭罷斥埃  
鯤海息戈鋌蠖屈真聊爾雄飛企勉旃出門常惻惻怨  
別每悄悄豈忘依粉櫓安知法泝沿瀑收川后靜秋霽  
望舒圓細酌曹溪水高凌句曲巔關河去渺渺鄉井思  
綿綿拂面祛塵垢褰衣裹足胼黃圖窮朔漠紫極拱星  
躔槐覆銅街轉香飄繡轂駢詞人投綵筆遊女拾金鈿

越國寧論價傾城要取憐機雲初入洛鄒樂遠遊燕擁  
簞傾流輩抽毫屬曠筵汾陰陪校獵岱岳議封禪交臂  
俱猿鶴來儀盡倖佗優游畫尊俎談笑沃腥膻脫畧牛  
衣賤綢繆鵲印縣終童何卓犖卜式豈迤邐伏櫪心無  
已攀龍竊慕焉奇勲堪自策玄理竟誰詮保已隨時運  
寧勞問着鞭

送李比部于鱗出守順德

英妙山東出珪璋信國珍靈篇秘海瀆寶劒動星辰擢

桂因才雋分曹以德隣冥心謝流輩傾意在交親潘岳  
宦從拙揚雄家素貧河山聊發興簪紱暫隨身丹地含  
香久蒼生掩泪頻聖情紆內郡雅意用儒紳襟帶幽并  
外風烟灞漭津建旌衝曉霧鳴玉起行塵止解詢遺逸  
何須問近臣燕巢公府靜草積射堂春故老皆扶杖餘  
波盡飲醇儀章從脫畧翰藻得情真嗟爾匡時器憐予  
避地人知名從白社傾蓋枉朱輪一以雲霄隔偏愁年  
髻新浮榮空自遣良覲杳何因所企歸釣軸深淵有縱

鱗

壽韓虞部應缺八十

士苑推縫掖君門隱歲星許身雙白壁勁氣一青萍歷  
塊才初展搏風勢未停水衝當重寄華省限嚴扃楚醴  
期終設齊鐘豈浪銘乞身常慊切優詔屢丁寧識面符  
公議憂時付獨醒家惟供稻秫年或採豨苓指樹從初  
日揮金樂暮齡友多援鶴異室有蕙蘭馨已見回淳俗  
還忻挹大庭橋邊遠進履濟下憶傳經遠素傳雙鯉飄

蓬感聚螢待公遊五岳迎氣在滄溟

寄錢叔寶

吳洲春草綠時復憶王孫蝦菜應隨俗蓬蒿獨閉門醉  
鄉心自遠隱士道何尊白雪丘中賞丹砂塵外言幽蘭  
空采擷藟桂日攀翻倘有臨池興清裁寄漆園

謁六忠廟

遺廟孤城裏經過為撫膺運窮天步窘釁起敵鋒乘鐘  
簾嗟旒綴江淮忽瓦崩空齟戈尚奮折骨障還登一死

關宗祐千秋有廢興  
穹碑纏莽草野日上觚稜  
委佩丹青落危冠  
氣色增鄰堪祠玉馬名  
自勒金騰大火時  
仍王洪河夕未澄  
蒼茫驅俗駕絮酒愧如澠

督府金湖方公召飲于籌邊堂賦得排律十六韻  
漢室當全盛邊陲未寢兵  
疇咨惟雋乂帷帟以儒生  
岳牧諸艱試崇班獨坐榮  
殷憂紆右顧長技在先聲  
賜履逾荒裔留屯罷遠征  
白登酬宿恥大宛墮名城  
鎮靜曹參畫風流庾亮情  
碧幢朝散騎玉帳夜休營  
高會深投



轉疎才濫請纓飛觥霑獵酒折俎過侯鯖尅密通家忝  
詞華四座傾中興得江漢人物信荆衡斥堠無嚴警銅  
街修曙更臨關真氣近回首將星明淮海思長孺朝端  
問廣平承雲歸燕鎬願附赤霄行

同張別駕梁進士管山人乾上人過曉上人方丈  
年少即披緇脩持似律師不邀支遁鶴惟擬惠休詩逸  
客名山至微官散地宜草書留素几琴曲動朱絲夕鳥  
窺簷下寒星入戶垂津梁猶未涉酬對莫言疲

萬佛閣後有中官王振祠

西土威儀衆東隅地位高桑田供一瞬沙界攝纖毫  
海若驅羣象神山湧鉅鼇雲容積蒼莽天籟起刁騷  
黃竹傷前事緇林庇此曹雍門何用愴送目藉香醪

隆福寺英宗命僧髻度於此

紺宇開馳道天人此給孤宮羅裁寶勝粉壁儷椒塗  
電露浮生感榮華逝水俱薜蘿縣翠網楊柳閣雕弧壯麗  
驚遊目清涼減病軀出門風色異羸馬倦長途

大慈仁寺國姻辭侯隱於此

高臺臨淨土遠近見神州  
吉夢曾徵帝真僧昔讓侯  
珠璣從喜捨金碧盡冥摛  
有樹皆成寶無枝不似虬  
路人頻折柳羈客倦登樓  
一見王孫草方知久滯遊

大慈恩寺即海印寺中有鏡光二閣今廢為內教場

赤帝開基日摩騰入漢來  
儀天開別宇鑿沼起層臺  
青崔翻粧鏡長鯨隱渡杯  
化城俄易愴玄象迭相催  
獵騎

呼鷹去遊人射雉迴摩尼長不滅累劫照沉灰

鷲峰寺本唐於河寺傍有貞觀刻心經後殿卧佛

一軀甚偉

幻身何處現此地借清涼大夢成蕉鹿千秋閱海桑碑  
猶貞觀列河已拔提荒欲問迷津者何如選佛場息心  
驅害馬失路有亡羊達者應齊契寧論滯異方

紫芝堂十六韻為太僕何石川公作

萬種徵名世靈芝茁卧園稍披珠網出漸覺紫烟屯斐

璧明如月

缺

瑤光分秀氣仙露灌靈根芬馥

連三徑琳瑯萃一門揮金歸日樂數馬古風存故里常  
懷綬茅簷或負暄戶庭圖海岳舟楫載琴尊稍證玄中  
秘還從河上言目能窺竹簡身自却蒲輪國以人為瑞  
家因義作藩奇齡開九袞娛老弄諸孫草木文章貴經  
綸雨露繁授書時已晚同閑道彌敦蒲柳憐衰質樗材  
濫曲轅長歌隨羽翼難忘漢宮恩

李季常汪公幹移居北園和季常

匡濟知無術年來學閉關清時難再得白髮任相拚龍  
卧無高轍雞棲止半間未論今日是誰喜一生間北戶  
涼初入南營靜可扳園中脩淨業城裏見青山但取襟  
期在寧知步履艱應門期獨鶴策杖代雙鬟酒自賒來  
得書從借不還棲遲慙下榻談笑得開顏更喜新詩就  
煩君細細刪

象教精舍

有序

孔陽宗侯近闢象教精舍屬予賦詩顧予未聞

內學豈可贊佛然千里授簡又不可無言也

三昧神僧火燒殘有壞身浮生同瞥電世界一微塵幻  
作元非有歸空亦未真益豪誰見相減胛為留神震旦  
符初志匡廬感宿因緘滕傳大令膜拜走王人鳩杖升  
蓮座田衣稱羶巾一時多妙說捨筏悵迷津

瑤石山人稿卷九